

Decreto 3/1987, do 8 de xaneiro, polo que se adscribe o Rexistro de Comunidades Galegas asentadas fóra de Galicia á Dirección Xeral de Relacións coas Comunidades Galegas e se establece o procedemento para solicita-lo recoñecemento da galegitude e a posterior inscrición no Rexistro.

O artigo 7.1 do Estatuto de Autonomía para Galicia establece que: "As Comunidades Galegas asentadas fóra de Galicia poderán socilitar como tales, o recoñecemento da súa gelegitude...".

En virtude desta declaración e mediante a Lei 4/83 de Galicia, definíuse a galegitude e estableceuse a vía necesaria para que se concedese o carácter de Comunidade Galega a determinadas entidades asociativas, sendo un dos trámites do dito procedemento: "... a inscrición da comunidade no Rexistro das Comunidades Galegas asentadas fóra de Galicia".

Disposto no artigo 15 da Lei 4/83 de Galicia, que: "Como servicio dependente da Xunta de Galicia créase o Rexistro de Comunidades Galegas asentadas fóra de Galicia..."

Tendo en conta a disposición final da Lei de Galicia anteriormente mencionada na que se autoriza á Xunta de Galicia: "... para dicta-las normas de desenvolvemento regulamentario...", para a súa maior efectividade, e resultando conveniente regula-la forma en que se debe solicita-lo recoñecemento da galegitude a que se refire o artigo 4 da Lei 4/83 de Galicia, así como o funcionamento do Rexistro das Comunidades Galegas asentadas fóra de Galicia, a que se refire o artigo 15, procede que se establezan as normas adecuadas para determina-lo procedemento das inscricións e a normalización da documentación.

Na súa virtude, a proposta do conselleiro da Presidencia e logo de deliberación do Consello da Xunta de Galicia, na súa reunión do día oito de xaneiro de mil novecentos oitenta e sete,

DISPOÑO:

ARTIGO 1°

1.- Adscríbese á Dirección Xeral de Relacións coas Comunidades Galegas o Rexistro das Comunidades Galegas asentadas fóra de Galicia.

2. No citado rexistro inscribírase toda entidade asociativa que o solicite conforme ás normas contidas neste decreto, despois de que así o acorde a autoridade do rexistro.

ARTIGO 2°

A entidade asociativa que pretenda obte-lo recoñecemento da galegitude deberá cumpri-los seguintes requisitos:

- a) Que o obxecto principal da entidade, recollido nos seus estatutos, sexa a constitución e o mantemento de lazos culturais ou sociais con Galicia, as súas xentes, a súa historia, a súa lingua e a súa cultura.
- b) Que conste a vontade de asociación, manifestada conforme ós seus estatutos.

ARTIGO 3°

1°. O procedemento para o recoñecemento da galeguidade iniciarse mediante instancia dirixida ó Excmo. Sr. Presidente da Xunta de Galicia a través da Dirección Xeral de Relacións coas Comunidades Galegas. As instancias formularáanse de acordo co modelo que figura no anexo correspondente e irán acompañadas da documentación que se indica no artigo 5°.

2°. Recibida a documentación, a citada dirección xeral aceptaraa no prazo de un mes ou sinalará os efectos que cumpra emendar.

Completada a documentación, o expediente será elevado, xunto co informe da Dirección Xeral de Relacións coas Comunidades Galegas, ó Consello da Xunta de Galicia, que adoptará, se é o caso, o acordo de recoñecemento da súa galeguidade á entidade solicitante.

3°. Recoñecida a galeguidade dunha entidade, a Dirección Xeral de Relacións coas Comunidades Galegas procederá, de oficio, a inscribila no Rexistro das Comunidades Galegas asentadas fóra de Galicia, notificando á entidade interesada o acordo do consello, que deberá ser publicado no Diario Oficial de Galicia.

ARTIGO 4°

O recoñecemento da galeguidade é condición necesaria para obtención de subvencións e outras axudas que poidan outorga-los organismos dependentes da Xunta de Galicia e para adquisición e disfrute dos dereitos recoñecidos na Lei de Galicia 4/83.

ARTIGO 5°

1. A documentación que se unirá á instancia de solicitude de recoñecemento de galeguidade será:

- a) Certificación da entidade na que figure, de maneira expresa, o acordo ó que se refire o artigo 2° b).
- b) Copia ou fotocopia dos estatutos vixentes da entidade, debidamente autenticada ou compulsada pola autoridade competente no país respectivo, demostrativa de que aquela foi constituída conforme ás leis vixentes no mesmo, así como de que o seu obxecto principal é o mantemento de lazos culturais ou sociais con Galicia.
- c) Certificado da relación nominal das persoas que compoñen a Xunta Directiva.
- d) Certificación acreditativa do número de socios da entidade.
- e) Memoria que inclúa os seguintes aspectos:
 - Datos de identificación.
 - Natureza, organización e fins da entidade.
 - Medios materiais e persoais de que dispón.
 - Actividades desenvolvidas durante o ano anterior ó da solicitude.
 - Programación das accións futuras.

2. A Dirección Xeral de Relacións coas Comunidades Galegas poderá solicitar en todo caso dos interesados cantos datos estime necesarios para xulgar tanto sobre a procedencia da inscrición solicitada como sobre a súa posterior cancelación por incumplimento das condicións ou fins que motivaron aquela.

ARTIGO 6•

A Xunta de Galicia concederá ou denegará o recoñecemento da galeguidade logo da valoración das circunstancias que concorran na entidade.

ARTIGO 7•

A cancelación da inscrición e, polo tanto, a conseguinte perda da galeguidade, poderá ser acordada polo Consello da Xunta de Galicia, mediante resolución motivada, cando se acredite algunha das causas seguintes:

- a) Extinción da personalidade xurídica da entidade, desaparición real da mesma ou cesamento das actividades.
- b) Revocación ou perda de eficacia das autorizacións preceptivas outorgadas no seu día polos organismos competentes para a súa válida constitución.
- c) Incumprimento sobrevido das condicións e circunstancias valoradas no momento do recoñecemento.
- d) Destino, de forma ilegal, a fins distintos, das subvencións e axudas concedidas pola Xunta de Galicia.

ARTIGO 8•

As comunidades galegas ás que lles sexa recoñecida a súa galeguidade deberán presentarlle á Xunta de Galicia, a través da Dirección Xeral de Relacións coas Comunidades Galegas, unha memoria anual que comprenda as actividades e traballos que realice a entidade.

ARTIGO 9•

O rexistro será público e os que acrediten a condición de interesados poderán acceder ó seu contido mediante manifestación dos libros ou certificación do asentamento correspondente.

ARTIGO 10•

O cambio de domicilio social, que en todo caso debe ser comunicado ó rexistro, non motivará por sí só expediente de modificación, agás que o ámbito territorial previsto no expediente de inscrición varíe substancialmente.

ARTIGO 11•

As modificacións estatutarias da entidade deberán ser comunicadas ó rexistro.

DISPOSICIÓNS TRANSITORIAS

Primeira

As comunidades galegas inscritas no censo privisional actualmente existente adaptaránse ó disposto neste decreto no prazo de un ano a partir da data da entrada en vigor do mesmo.

Segunda

A dirección xeral tramitará de oficio para elevado ó Consello da Xunta de Galicia, para efectos de recoñecemento da galeguidade, as solicitudes xa presentadas que e axusten ó previsto neste decreto e que figuren no consello provisorio.

DISPOSICIÓN DERRADEIRAS

Primeira

Quedan derogadas cantas disposicións se opoñan ó establecido neste decreto.

Segunda

Facúltase á Consellería da Presidencia para dicta-las normas necesarias para o desenvolvemento e execución do establecido neste decreto.

Terceira

Este decreto entrará en vigor o día seguinte ó da súa publicación no Diario Oficial de Galicia.

Santiago de Compostela, 8 de Xaneiro de 1987.